

TEKS UCAPAN
YANG HORMAT PROFESOR DATO' DR. DAING NASIR IBRAHIM
NAIB CANSELOR UNIVERSITI MALAYSIA PAHANG
SEMPENA MAJLIS MALAM SENTUHAN KASIH
PADA HARI SABTU, 8 APRIL 2017; PUKUL 8:00 MALAM
DI ASTAKA, UMP KAMPUS GAMBANG

SALUTASI

Saudara pengacara majlis;

Yang Berhormat Dato' Norol Azali Sulaiman,
Pengerusi Jawatankuasa Kesihatan, Sumber Manusia
dan Tugas-Tugas Khas Negeri Pahang;

Yang Hormat Dato' Haji Wan Bakri Wan Ismail
Ketua Pegawai Eksekutif
Perbadanan Kemajuan Pertanian Negeri Pahang;

Ahli-ahli Lembaga Pengarah UMP:

Yang Hormat Dato' Haji Ahmad Azmey Haji Abu Talib

dan Yang Berusaha Encik Mohd Zahrain Mohd Nor;

Yang Dato' Mohd Rizal Mohd Ja'afar,
Ahli Lembaga Pemegang Amanah *MyGift* UMP;

Rakan-rakan saya dari UMP;

Yang Hormat Profesor Dato' Dr. Rosli Mohd Yunus,
Timbalan Naib Canselor (Akademik & Antarabangsa);

Yang Hormat Profesor Dato' Dr. Yuserrie Zainuddin,
Timbalan Naib Canselor (Hal Ehwal Pelajar & Alumni);

Profesor Dr. Mashitah Mohd Yusoff,
Timbalan Naib Canselor (Penyelidikan & Inovasi)

Yang Hormat Profesor Dato' Dr. Ishak Ismail,
Penolong Naib Canselor (Hal Ehwal Korporat & Kualiti)

Profesor Dr. Jamil Ismail,
Penolong Naib Canselor (Jaringan Industri & Masyarakat);

Pegawai-pegawai Utama, Dekan-dekan, Pengarah-pengarah
dan Ketua-ketua Pusat Tanggungjawab;

Yang diraikan pihak pengurusan dan warga
Rumah Anak Yatim Nur Iman, Kuala Rompin
dan Rumah Penyayang Tun Abdul Razak, Pekan;

Tuan-tuan dan puan-puan,

Warga mahasiswa dan pelajar yang dikasihi.

Assalamualaikum warahmatullahi wabarakatuh,

Salam Sejahtera dan Salam 1Malaysia.

KATA PEMBUKA

1. *Alhamdulillah*, sukalah saya merafakkan setinggi-tinggi kesyukuran ke hadrat Allah Ta'ala, kerana dengan limpah rahmat, kurnia dan izin-Nya, maka kita dapat bertemu dalam majlis pada malam ini.

2. Terlebih dahulu, bagi pihak pengurusan dan seluruh warga Universiti ini, saya ingin mengucapkan selamat datang kepada tetamu kehormat kita, Yang Berhormat Dato' Norol Azali Sulaiman, Pengerusi Jawatankuasa Kesihatan, Sumber Manusia dan Tugas-Tugas Khas Negeri Pahang ke UMP Kampus Gambang bagi menyerikan Malam Sentuhan Kasih ini.
3. Selain itu, saya juga ingin mengalu-alukan kehadiran Yang Hormat Dato' Haji Wan Bakri Wan Ismail, Ketua Pegawai Eksekutif Perbadanan Kemajuan Pertanian Negeri Pahang (PKPP) dan delegasinya ke majlis ini.
4. Sukacita saya sebutkan di sini bahawa penganjuran Malam Sentuhan Kasih ini merupakan hasil kerjasama erat antara pihak UMP dan PKPP memperkuatkannya lagi jaringan strategik kedua-dua pihak yang telah sedia terbina.

5. Dalam konteks tersebut, UMP sentiasa terbuka dan bersedia untuk meneroka ruang dan potensi kolaborasi strategik yang lebih luas dengan pihak PKPP. Ini termasuk perkongsian kepakaran saintifik dan teknikal Universiti ini dengan fokus urusan dan teras perniagaan PKPP dalam bidang pertanian dan perladangan.

6. Justeru, sokongan berterusan Kerajaan Negeri Pahang di bawah kepimpinan Yang Amat Berhormat Dato' Sri Diraja Haji Adnan Haji Yaakob terhadap inisiatif pengembangan jaringan strategik antara UMP dengan agensi dan anak syarikat kerajaan negeri, termasuklah PKPP amatlah dihargai dan dialu-alukan pihak pengurusan Universiti ini.

7. Maka, majlis Malam Sentuhan Kasih ini adalah ibarat permulaan kepada sebuah rangka kerja kolaborasi yang lebih konstruktif untuk diterokai pihak UMP dan PKPP pada masa hadapan.

8. Pada malam ini umpamanya, kedua-dua pihak berjaya bekerjasama dalam menunaikan Tanggungjawab Sosial Korporat (CSR) masing-masing dengan meraikan warga Rumah Anak Yatim Nur Iman dan Rumah Penyayang Tun Abdul Razak serta anak-anak yatim dari kalangan mahasiswa UMP dan warga PKPP seramai 166 orang.

PROGRAM SENTUHAN KASIH

9. Yang Berhormat Dato', tuan-tuan dan puan-puan,

Sukacita juga saya nyatakan di sini bahawa hasil perancangan awal yang dibuat dan permuafakatan yang dicapai dengan pihak PKPP, maka kita berjaya mengatur program yang menarik dengan aktiviti yang interaktif untuk anak-anak yatim yang diraikan dalam majlis ini.

10. Malam Sentuhan Kasih ini merupakan kemuncak kepada pelbagai aktiviti yang telah disertai oleh anak-anak yatim tersebut sejak awal pagi tadi lagi di mana mereka telah dibimbing oleh para mahasiswa UMP dalam sesi latihan dalam kumpulan, permainan minda, lawatan sekitar kampus dan seterusnya dibawa bersantai di Bukit Gambang Resort City hingga lewat petang tadi.
11. Kepelbagaian sifat pengisian aktiviti tersebut semata-mata bertujuan memberikan galakan dan motivasi kepada para peserta untuk lebih bersemangat dalam meniti cabaran kehidupan sebagai anak yatim di samping menyuntik kesedaran dalam diri mereka bahawa walaupun tanpa ibu atau bapa di sisi, masih ramai individu banyak pihak yang mengasihi dan mengambil berat perihal anak-anak yatim ini.
12. Maka, dengan sokongan moral pelbagai pihak dan sumbangan para dermawan tersebut, saya secara peribadi menasihatkan anak-anak yang diraikan pada malam ini supaya sentiasa bersyukur dengan rahmat dan nikmat yang dikurniakan Allah Ta'ala kepada anda sekalian dan membalaik kebaikan para dermawan tersebut dengan belajar bersungguh-sungguh dan menjadi insan yang cemerlang di dunia dan di akhirat.

13. Kita amat bersyukur kerana selain sumbangan kewangan kepada Rumah Anak Yatim Nur Iman dan Rumah Penyayang Tun Abdul Razak, pihak PKPP turut menaja peralatan sekolah kepada para anak yatim yang terlibat dalam program ini.

KOMITMEN SOSIAL UMP

14. Yang Berhormat Dato', tuan-tuan dan puan-puan,

Selaras dengan pelaksanaan Pelan Strategik UMP 2016-2020, pihak pengurusan Universiti ini komited untuk memasyarakatkan UMP melalui dua medium utama iaitu kepakaran teknologi dan gerak kerja kesukarelawanan.

15. Dalam hubungan tersebut, pelbagai inisiatif libatsama sosial (*social engagement*) telah, sedang dan akan diaturgerak bagi memastikan masyarakat umum, khususnya rakyat di Negeri Pahang menerima manfaat daripada kewujudan Universiti ini.

16. Bagi menjayakan agenda Universiti Komuniti dalam kerangka pelaksanaan Pelan Strategik UMP 2016-2020 tersebut, maka pihak pengurusan Universiti ini sentiasa menyambut baik sebarang hasrat daripada mana-mana jabatan, agensi atau badan berkanun Persekutuan dan Negeri, syarikat berkaitan kerajaan, badan swasta, pertubuhan awam atau individu untuk berkolaborasi dalam pelbagai bentuk demi faedah umum.
17. Selain kolaborasi dalam bentuk pengelolaan aktiviti seperti Malam Sentuhan Kasih ini, UMP turut mengharapkan sokongan pelbagai pihak untuk beramal jariah bagi maksud wakaf pendidikan dan endowmen melalui dana *MyGift* yang telah dilancarkan secara rasmi oleh Kebawah Duli Yang Maha Mulia Sultan Pahang pada 1 Oktober 2016 yang lalu.
18. Pengwujudan sembilan jenis tabung di bawah inisiatif *MyGift* tersebut membolehkan para dermawan dari kalangan agensi awam, badan korporat dan orang perseorangan menentukan bentuk sumbangan yang dihasratkan bagi disalurkan kepada penerima manfaat yang berkenaan.

19. Penglibatan pelbagai pihak untuk tampil menyumbang dan menderma melalui dana *MyGift* berupaya melestarikan ekosistem sedekah dan amal jariah, khususnya untuk manfaat para mahasiswa Universiti ini khasnya dan aggota masyarakat lain amnya.
20. Untuk makluman, dana *MyGift* setakat ini telah digunakan bagi peruntukan biasiswa, hadiah kecemerlangan akademik, program Kongsi Rezeki dan *Food For All*, bantuan bencana dan sebagainya. Melalui agenda *MyGift* juga, pihak pengurusan UMP turut mengharapkan sumbangan para dermawan untuk merealisasikan pembinaan Kolej Kediaman Mawaddah di UMP Pekan dengan RM4.5 juta dengan usahasama Majlis Ugama Islam dan Adat Resam Melayu Pahang dan juga pembinaan Masjid UMP Pekan.

KATA PENUTUP

22. Yang Berhormat Dato', tuan-tuan dan puan-puan,

Mengakhiri ucapan ini, saya bagi pihak pengurusan dan seluruh warga UMP sekali lagi merakamkan setinggi-tinggi penghargaan dan terima kasih kepada PKPP atas keprihatinan korporatnya untuk memperuntukkan sumbangan kewangan yang begitu besar ertinya yang membolehkan kita merealisasikan pengelolaan majlis ini.

23. Mudah-mudahan aliran manfaat daripada sumbangan ini akan terus berpanjangan sebagai sedekah jariah yang tulus dan ikhlas di sisi Allah Ta'ala dengan capaian faedahnya kepada seramai mungkin pihak yang memerlukan, *Amin*.

24. Saya juga ingin merakamkan setinggi-tinggi ucapan terima kasih kepada semua pihak yang terlibat secara langsung dan tidak langsung atas kelancaran penganjuran majlis pada malam ini.

Sekian, *wabillahi taufiq walhidayah*,

Assalamualaikum warahmatullahi wabarakatuh.